

Berguenza

Pa: Roland W. Peterson



Pa: Roland W. Peterson

Un par di aña pasa, den un corant local mi a mira un potret y a lesa un articulo di un pareha turista Americano, cu tabata bisita nos isla. Nan tabatin basora cu hemchi den man y nan tabata haci Aruba limpi. E corant a gaba nan pa nan trabao. Pa e bunita gesto aki bo mester kita bo sombre. Ami tambe a kita mi sombre, pero ora mi a wak den spiel me a mira un cabez cora. Si cora, pero no di kima den solo, pero di "berguenza". Si berguenza, pasobra te awe mi no por imagina, cu ta ami ta haciendo e lugar limpi na na pais.

Tur ora mi pasa banda di "porkeria" cu hende a benta canto di caminda, e potret ey ta bin mi dilanti den mi mente. Ta tristo pa mira kiko of con hopi nos Arubianonan, of mas mihor bisa, nos habitantenan, ta suchia e lugar. "Ki berguenza".

Un par di dia pasa, mi a pasa banda di un di e "Arubaanse bezienswaardigheid" Atraccion Arubiano aki. Tabatin un stoof bieuw, dos cashi bieuw kibra y un colchon "king size" tur mancha y sushi. Plo ainda tur e cosnan aki tabata doma cu "porkeria" di sushi di cas. E rey cu a drumi riba e "king" size colchon aki, mester por haña un boet. Autoridad por caba cu e bagabundaria aki dor di duna e "sushador" aki un boet di cinco mil florin for di e prome biaha cu e la wordo atrapa. E ora ey bo ta mira con lihe tiramento di sushi canto di caminda lo cuminsa caba .

Pero e problema ta con bo ta atrapa y boet un hende cu ta benta "porkeria" canto di caminda etc.?

Wel cu e articulo aki mi ta bay purba. Den tur mi articulonan, si mi critica, semper mi ta purba bin cu solucion tambe.

Den e "Algemene Politieverordening" APV, Ordenanza Policial tin un articulo unda cu ta prohibi pa tira sushi riba e "openbare weg", caminda publico. Tur e lugaman cu ami a mira, cu "porkeria" benta riba nan, ta cay bou di caminda publico. Aparentemente e APV no ta wordo aplica efectivamente. Anto kiko nos por haci?

Un lugar sushi ta dañino pa salud di hende, ta strobe negoshinan, ta aumenta criminalidad y ta un mahos vista.

E articulo aki no ta duna un simpel "solucion of recet, kiko mester wordo haci pa soluciona e problematica aki pa esaki e materia ta mucho complica, pero mi ta spera cu mi recomendacionnan ta pone bo pensa si na unda por cuminsa traha riba dje.

Mas cu binta aña pasa, a baha hendenan riba e luna, pero awe ainda nos no por tene e pida baranka aki limpi. "Ki berguenza". Ta unda nos a faya?

E ta un illusion pa pensa cu di biaha nos por caba cu tur problema aki.

Mi ta kere cu pueblo, e ultimo añanan, si a bira mas critico riba e tereno aki, pero te ainda nos no ta realisa e grandura di e peliger.

Ora nos papia di e problema ambiental, nos mester pensa mas lieu cu sushia un lugar cu "porkeria" di cas. Nos tambe mester pensa riba nos aire, awanan den tera y rond di nos isla, y e tranquilidad. Mi ta kere dor cu hopi hende no sa di e peliger, nan no ta "worry" mucho cu e problema. Den e saki nos Prensa y Media mester hunga un rol sumamente importante pa yuda concientisa nos pueblo.

Informacion mester wordo duna cu e proposito, cu a lo largo e por tin su efecto.

Informacion di nos medio ambiente mester wordo duna na e personanan cu ta combati e problema (e expertonan) y na pueblo en general.

Mester bin un bon entendimento entre e "Public/Private Sector" Sector Publico y Priva..

Pa combati e problema aki, polis mester wordo involvi mas, pero dor di nan otro problemanan (entre otro escases di personal y falta di informacion) nan no tin mucho tempo pa medio ambiente. Ora e "pakkans", e saki ta e posibilidad pa wordo atrapa, bira mas grandi ora ey e criminalidad ta baha.

Manera mi a menciona caba nos mester pensa riba un "Public/Private samenwerking". Un systema manera nos tin e Aruba Hospitality and Security Foundation.(AH&SF).

Nos systema di AH&SF a wordo copia caba na diferente pais.

Nos NO mester bin cu un cuerpo special; e saki ta bay tarda mucho y e ta caro tambe.

Haci uso di un par di polis y expande nan cu personanan cu por actua independiente (traha proes-verbal) etc.

Mester bin bon cooperacion entre Fiscal, Polis, Directie Volksgezondheid/Milieu, DTI y Serlimar.

Volksgezondheid/Milieu mester hunga un rol importante den asunto aki. Ta nan mester bisa ora un situacion of material (solido of liquido) ta peligroso y asina duna Fiscal y Polis caminda pa cana.

Na tur e departamentonan menciona aki riba mester bin un "contact person" cu ta keda den contacto cu otro y na altura di e problematico.

Mi sa cu dor di scirbi un articulo cortico, mi ta core e risco pa lubida algo.

Mi speranza ta, cu dor di e articulo aki, bo tambe ta cuminsa pensa con pa yuda combati e problematico di sushedad, anto e ora ey si nos tur hunto por logra nos meta y e no ta un Berguenza.